

四庫全書

集部

欽定四庫全書

萬首唐人絕句卷五十二

宋 洪邁 編

七言

比紅兒詩

羅虬

其一

姓氏看侵尺五天
芳名占斷百花鮮
馬嵬好笑當時事
虛賺明皇幸蜀川

其二

金谷園中花正繁
墜樓從道感深恩
齊奴恰是來東市
不為紅兒死更寬

其三

陷却平陽為小憐
周師百萬戰長川
更教乞與紅兒貌
舉國山河不直錢

其四

一曲都緣張麗華
六宮齊唱後庭花
若教比並紅兒貌

枉破當時國與家

其五

樂營門外柳如陰
中有家人畫閣深
若是五陵公子見
買時應不啻千金

其六

青絲高綰石榴裙
腸斷當筵酒半醺
置向漢宮圖畫裏
和我應不數貽君

其七

斜凭欄干醉態新
斂眸微盼不勝春
當時若遇東昏主
金葉蓮花是此人

其八

匝匝千山與萬山
碧桃花下景長閒
神仙得似紅兒貌
應免劉郎憶世間

其九

越山重疊越溪斜
西子休憐解浣紗
得似紅兒今日貌
肯教將去與夫差

具十

詔下人間選好花
月眉雲髻盡名家
紅兒若向當時見
繫臂先封第一紗

十一

鋒鏑縱橫不敢看
淚垂玉筋正洑瀾
應緣近似紅兒貌
始得深宮奉五官

十二

金縷濃熏百和香
臉紅眉黛入時粧
當時若向喬家見

未敢將心在窈孃

十三

通宵甲帳散香塵漢帝精誠禮百神若見紅兒醉中態
也應休憶李夫人

十四

拔得芙蓉出水新魏家公子信才人若教瞥見紅兒貌
不肯留情賦洛神

十五

芳姿不合並常人雲在遙天玉在塵因事愛思荀奉倩
一生閒坐枉傷神

十六

筆底如風思涌泉賦中休漫說嬋娟紅兒若在東家住
不得登牆爾許年

十七

一抹濃紅傍臉斜粧成不語獨攀花當時若是逢韓壽
未必埋蹤在賈家

十八

樹裏西風日半沉
地無人跡轉傷心
阿嬌得似紅兒貌
不費長門買賦金

十九

五雲高捧紫金堂
花下投壺侍玉皇
從道世人都不識
也應知有杜蘭香

二十

戲水源头指舊蹤
當時一笑也難逢
紅兒若為回桃臉

豈比連催舉五峰

二十一

號國夫人照夜璣若為求得與紅兒醉和香態濃春裏
一樹繁花偃繡幃

二十二

知有持盈玉葉冠剪雲裁月照人寒若使紅兒風貌戴
直似瑤池會上看

二十三

欽定四庫全書

明媚何曾讓玉環
破瓜年幾百花顏
若教貌向南朝見
定却梅粧似等閒

二十四

世事悠悠未足稱
懶將閒事更爭能
自從命向紅兒斷
不欲留心在裂繒

二十五

自隱新從夢裏來
巔雲微步下雲臺
含情一向春風笑
羞殺凡花盡不開

二十六

捨却青蛾換玉鞍
古來公子苦無端
莫言一足追風馬
天驥牽來也不看

二十七

檻外花低瑞露濃
夢魂驚覺暈春容
憑君細看紅兒貌
最稱嚴粧待曉鐘

二十八

薄羅輕剪越溪紋
鴟翅低從兩鬢分
料得相如偷見面

不應琴裏挑文君

二十九

南國東鄰各一時後來唯有杜紅兒若教楚國宮人見
羞把腰身並柳枝

三十

照耀金釵簇膩鬟見時直向畫屏間黃姑阿母能判剖
十斛明珠也是閒

三十一

輕小休誇似燕身生來占斷紫宮春漢皇若遇紅兒貌
掌上無因着別人

三十二

鸚鵡娥如裛露紅鏡前眉樣自深宮稍教得似紅兒貌
不嫁南朝沈侍中

三十三

擬將心地學安禪爭奈紅兒笑靨圓何物把來看比並
野塘初綻一枝蓮

三十四

浸草漂花遶檻香最憐穿度樂營牆殷勤留滯緣何事
曾照紅兒一面粧

三十五

雕陰舊俗逞嬋娟有箇紅兒賽洛川常笑世人多誑誕
今朝自見火中蓮

三十六

渡口諸儂樂未休竟陵西望路悠悠石城有箇紅兒貌

兩槩無因迎莫愁

三十七

誰向深山識大仙
勸人山下引春泉
定知不及紅兒貌
枉却工夫溉玉田

三十八

傾國傾城總絕倫
紅兒花下認真身
十年東北看燕趙
眼冷何曾見一人

三十九

今時自謂不諳知前代由來事見為一笑陽城人便惑
何堪教見杜紅兒

四十

京口喧喧百萬人競傳河鼓謝星津奈花似雪爭簪髻
今日天容是後身

四十一

青史書來未是真可知纖智却狂秦再三為謝齊王后
要解連環別與人

四十二

繡帳鴛鴦對刺紋博山微暖麝微薰詩人若有紅兒貌
悔道當時月墜雲

四十三

薄粉輕朱取次施大都端正亦相宜只如花下紅兒態
不藉城中半額眉

四十四

粧成渾欲認前朝金鳳雙釵遂步採未必慕容宮裏伴

舞風歌月勝纖腰

四十五

琥珀釵成恩正深
玉兒妖惑蕩吾心
莫教回首勻粧面
始覺曾虛擲萬金

四十六

自有閒花一面春
臉檀眉黛一時新
殷勤為報梁家婦
休把啼粧賺後人

四十七

輕梳小髻號慵來
巧中君心不用媒
可得紅兒拋醉眼
漢皇恩澤一時回

四十八

千里長江旦暮潮
吳都風俗尚纖腰
周郎若見紅兒貌
料得無心念小喬

四十九

月落潛奔暗解攜
本心誰道欲單棲
還緣交甫非良偶
不肯終身作羿妻

五十

漢皇曾識許飛瓊
寫向人間作畫屏
昨日紅兒簾下見
大都相似更娉婷

五十一

魏帝休誇薛夜來
霧綃紅縠稱身裁
紅兒秀發君知否
倚檻繁花帶露開

五十二

曉日雕梁燕語頻
見花難可比他人
年年媚景歸何處

長作紅兒面上春

五十三

逗玉濺盆浴殿開
邀恩先賜夜明苔
紅兒若是三千數
多少芳心似死灰

五十四

畫簾垂地紫金牀
暗引羊車駐七香
若是紅兒此中住
不勞烟篠灑宮廊

五十五

蘇小輕勻一面批便留名字著錢塘藏鴉門外諸年少
不識紅兒未是狂

五十六

一首長歌萬恨來惹愁漂泊水難回崔徽有底多頭面
費得微之爾許才

五十七

昔年黃閣識奇章愛說真珠似窈孃若是紅兒夜深態
便應休說繡衣裳

五十八

鳳折鶯離恨轉深此生難負百年心
紅兒若向隋朝見破鏡無因更重尋

五十九

行縮穠雲立駐軒我來猶愛不成寬
當時若見紅兒貌未必相形有此言

六十

總是紅兒媚態新莫論千度笑爭春
任伊絲武心如鐵

不辨軍前殺此人

六十一

暖塘爭赴蕩舟期行唱菱歌著艷詞為問東山謝丞相
可能諸妓勝紅兒

六十二

吳興皇后欲辭家澤國宮臺展絳霞今日紅兒貌傾國
恐須真宰別開花

六十三

陌上行人歌黍離三千門客欲何之若教麤及紅兒貌
爭肯樓前斬愛姬

六十四

休話如臯一笑時金髻中臆錦離披陋容枉把雕弓射
射盡春禽未展眉

六十五

長恨西風送早秋低眉深念嫁牽牛若同人世長相對
爭作夫妻得到頭

六十六

謝孃休漫逞風姿未必娉婷勝柳枝聞道只應嘲落絮
何曾得似杜紅兒

六十七

總傳桃葉渡江時只為王家一首詩今日紅兒自堪賦
不須重唱舊來詞

六十八

巫山洛浦本無情總為佳人便得名今日雕陰有神艷

後來公子莫相輕

六十九

幾拋雲髻恨金墉
淚洗花顏百戰中
應有紅兒些子貌
却言皇后長深宮

七十

倚檻還應有所思
半開香閣見嬌姿
可中得似紅兒貌
若遇韓朋好殺伊

七十一

曉向紗窻與畫眉鏡中長欲助嬌姿若教得似紅兒貌
走馬章臺任道遲

七十二

鍊得霜華助翠鈿相期朝謁玉皇前依稀似紅兒貌
方得吹簫引上天

七十三

重門深掩幾枝花未勝紅兒莫太誇玉柄不能探物理
可能虛上短轆車

七十四

前代休憐事可竒
後來還出有光輝
爭知畫卧紗窻裏
不有神人覆玉衣

七十五

羽化嘗聞赴九天
只疑塵世是虛傳
自從一見紅兒貌
始信人間有謫仙

七十六

從道長陵小市東
巧將花貌占春風
紅兒若是同時見

未必伊先入紫宮

七十七

人間難免是深情
命斷紅兒向此生
何似前時李丞相
枉拋身力為鶯鶯

七十八

鳳舞香飄繡幕風
暖穿馳道百花中
還緣有似紅兒貌
始得迎將入漢宮

七十九

休道將軍出世才盡驅諸妓下歌臺都緣沒箇紅兒貌
致使輕教後閣開

八十

馮媛須知住漢宮將身只是解當熊不聞有貌傾人國
爭得今朝更比紅

八十一

能將一貌使人迷花艷何須上大堤踈屬便同巫峽路
洛川真是武陵溪

八十二

辭輦當時意可知
寵深還恐寵先衰
若教得似紅兒貌
占却君恩自不疑

八十三

三吳時俗重風光
未見紅兒一面粧
好寫妖嬈與教看
便應休更話真嫌

八十四

波平楚澤浸星辰
臺上君王宴早春
畢竟章華會中客

冠纓虛絕為何人

八十五

紅兒不向漢宮生
便使雙成漫得名
疑是麻姑惱塵世
暫教微步下層城

八十六

天碧輕紗只六銖
宛風含露透肌膚
便教漢曲爭明媚
應沒心情更弄珠

八十七

共嗟含恨向衡陽
方寸花牋寄沈郎
不似紅兒些子貌
當時爭得少年狂

八十八

淺色桃花亞短牆
不因風起也聞香
凝情盡日君知否
還似紅兒淡薄粧

八十九

火色櫻桃摘得初
仙宮只有世間無
凝情盡日君知否
真似紅兒口上朱

九十

宿雨初晴春日長
入簾花氣靜難忘
凝情盡日君知否
真似紅兒舞袖香

九十一

初月纖纖映碧池
池波不動獨看時
凝情盡日君知否
真似紅兒罷舞眉

九十二

濃艷濃香雪壓枝
裊煙和露曉風吹
紅兒被掩粧成後

含笑無人獨立時

九十三

樓上嬌歌裊夜霜
近來休數踏歌娘
紅兒慢唱伊州遍
認取輕敲玉韻長

九十四

金粟粧成扼臂環
舞腰輕轉瑞雲間
紅兒生在開元末
羞殺新豐謝阿蠻

九十五

君看紅兒學醉粧
袴裁官纈研裙長
誰能更把閒心力
比並當時武媚孃

九十六

梳子同心裏露垂
折來深恐没人知
花前醉客頻相問
不贈紅兒贈阿誰

九十七

雲開翡翠一雙飛
水上鴛鴦不暫離
寫向人間百般態
與君題作比紅詩

九十八

舊恨長懷不語中
幾回偷淚向春風
還緣不及紅兒貌
却得生教入楚宮


九十九

一舸春深指鄂君
好風從度水成紋
越人若見紅兒貌
繡被應羞徹夜薰

一百

花落塵中玉墮泥
香魂應上窈孃堤
欲知此恨無窮處

長情城烏夜夜啼



萬首唐人絕句卷五十二

欽定四庫全書

集部

萬首唐人絕句卷五十三至五

詳校官庶吉士臣柳遵祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷五十三

宋 洪邁 編

七言

詠史詩

胡曾

烏江

爭帝圖王勢已傾，
八千兵散楚歌聲。
烏江不是無船渡，
恥向東吳再起兵。

章華臺

茫茫衰草沒章華因笑靈王昔好奢臺土未乾簫管絕
可憐身死野人家

細腰宮

楚王辛苦戰無功國破城荒霸業空唯有青春花上露
至今猶泣細腰宮

沙苑

馮翊南邊宿霧開行人一步一徘徊誰知此地凋殘柳

盡是高歡敗後栽

石城

古郢雲開白雪樓
漢江還遶石城流
何人知道寥天月
曾向朱門送莫愁

荆山

抱玉巖前桂葉稠
碧谿寒水至今流
空山落日猿聲叫
疑是荆人哭未休

陽臺

楚國城池颯已空
陽臺雲雨過無蹤
何人更有襄王夢
寂寂巫山十二重

居延

漠漠平沙際碧天
問人云此是居延
停驂一顧猶魂斷
蘇武爭禁十九年

沛宮

漢高辛苦事干戈
帝業興隆俊傑多
猶恨四方無壯士
還鄉悲唱大風歌

金谷園

一自佳人墜玉樓繁華東逐洛河流唯餘金谷園中樹
殘日蟬聲送客愁

湘川

虞舜南捐萬乘君靈妃揮涕竹成紋不知精魄遊何處
落日瀟湘空白雲

夷門

六龍冉冉驟朝昏魏國賢才杳不存唯有侯嬴在時月

夜來空自照夷門

黃金臺

北乘羸馬到燕然
此地何人復禮賢
欲問昭王無處所
黃金臺上草連天

夷陵

夷陵城闕倚朝雲
戰敗秦師縱火焚
何事三千珠履客
不能西禦武安君

漢江

漢江一帶碧流長
兩岸春風起綠楊
借問膠船何處沒
欲停蘭棹祀昭王

蒼梧

有虞龍駕不西還
空委簫韶洞壑間
無計得知陵寢處
愁雲長滿九疑山

陳宮

陳國機權未可涯
如何後主恣嬌奢
不知即入宮中井
猶自聽吹玉樹花

南陽

世亂英雄百戰餘孔明方此樂耕鋤蜀王不自垂三顧
爭得先生出舊廬

即墨

即墨門開縱火牛燕師營裏血波流圖存不得田單術
齊國尋成一土丘

渭濱

岸草青青渭水流子牙曾此獨垂鈎當時未入非熊兆

幾向斜陽歎白頭

五湖

東上高山望五湖
雪濤煙浪起天隅
不知范蠡乘舟後
更有功名繼踵無

易水

一旦秦王馬角生
燕丹歸北送荆卿
行人欲識無窮恨
聽取東流水聲

長平

長平瓦震武安初趙卒俄成戲鼎魚四十萬人俱下世
元戎何用讀兵書

西園

月滿西園夜未央金風不動鄰天涼
高情公子多秋興
更領詩人入醉鄉

長沙

江上南風起白蘋長沙城郭異咸秦
故鄉猶自嫌早濕
何況當時賦鵬人

圮橋

廟筭張良獨有餘少年逃難下邳初
逡巡不進泥中履
爭得先生一卷書

銅雀臺

魏武龍輿逐逝波高臺空接望陵歌
過雲聲絕悲風起
翻向樽前泣翠娥

東晉

石頭城下浪崔嵬風起聲疑出地雷
何事符堅太相小

欲投鞭策過江來

吳江

子胥今日委東流
吳國明朝亦古丘
大笑夫差諸將相
更無人解守蘇州

函谷關

寂寂函關鎖未開
田文車馬出秦來
朱門不養三千客
誰為雞鳴得放回

武關

戰國相持竟不休
武關纔掩楚王憂
出門若取靈均語
豈作咸陽一死囚

垓下

拔山力盡霸圖隳
倚劍空歌不逝騅
明月滿營天似水
那堪回首別虞姬

郴縣

義帝南遷路入郴
國亡身死亂山深
不知埋恨窮泉後
幾度西陵片月沉

東海

東巡玉輦委泉臺徐福樓船尚未回自是祖龍先下世
不關無路到蓬萊

故宜城

武安南伐勒秦兵踈鑿功將夏禹并誰謂長渠千載後
水流猶入故宜城

成都

杜宇曾為蜀帝王化禽飛去舊城荒年年來叫桃花月

似向春風訴國亡

檀溪

三月襄陽綠草齊
王孫相引到檀溪
的盧何處埋龍骨
流水依前遶大堤

青塚

玉貌元期漢帝招
誰知西嫁怨天驕
至今青塚愁雲起
疑是佳人恨未銷

李陵臺

北入單于萬里疆五千兵敗滯窮荒英雄不伏蠻夷死
更築高臺望故鄉

河梁

漢家英傑出皇都攜手河梁話路隅不是子卿全大節
也應低首拜單于

軼道

漢祖西來秉白旄子嬰宗廟委波濤誰憐君有翻身術
解向秦宮殺趙高

漢宮

明妃遠嫁泣西風
玉筋雙垂出漢宮
何事將軍封萬戶
却令紅粉為和戎

豫讓橋

豫讓酬恩歲已深
高名不朽到如今
年年橋上行人過
誰有當時國士心

華亭

陸機西沒洛陽城
吳國春風草又青
惆悵月中千歲鶴

夜來猶為唳華亭

東山

五馬南浮一化龍
謝安入相此山空
不知攜妓重來日
幾樹鶯啼谷口風

殺子谷

舉國賢良盡淚垂
扶蘇屈死樹邊時
至今谷口泉鳴咽
猶似秦人恨李斯

馬陵

墜葉蕭蕭九月天
驅兵獨過馬陵前
路傍古木蟲書處
記得將軍破敵年

玉門關

西戎不敢過天山
定遠功成白馬閒
半夜帳中停燭坐
唯思生入玉門關

滹沱河

光武經營業未興
王郎兵革正憑陵
須知後漢功臣力
不及滹沱一片冰

黃河

博望沉埋不復旋
黃河依舊水茫然
汭流欲共牛郎語
只得靈槎送上天

鳳凰臺

秦娥一別鳳凰臺
東入青冥更不回
空有玉簫千載後
遺聲時到世間來

五丈原

蜀相西驅十萬來
秋風原下久徘徊
長星不為英雄住

半夜流光落九垓

平城

漢帝西征陷塞塵一朝圍解議和親當時已有吹毛劍
何事無人殺奉春

汴水

千里長河一旦開亡隋波浪九天來錦帆未落干戈起
惆悵龍舟更不回

蘭臺宮

遲遲春日滿長空亡國離宮蔓草中
宋玉不憂人事變從遊那賦大王風

金牛驛

山嶺千重擁蜀門成都別是一乾坤
五丁不鑿金牛路秦惠何由得併吞

望思臺

太子銜冤去不回臨臯從築望思臺
至今漢武銷魂處猶有悲風木上來

邯鄲

曉入邯鄲十里春東風吹下玉樓塵青娥莫怪頻含笑
記得當年失步人

箕山

寂寂箕山春復秋更無人到此溪頭棄瓢巖畔中宵月
千古空聞屬許由

會稽山

越王兵敗已山棲豈望全生出會稽何事夫差無遠慮

更開羅網放鯨鯢

不周山

共工爭帝力窮秋因此捐生觸不周遂使世間多感客
至今哀怨水東流

虞坂

悠悠虞坂路歌斜遲日和風簇野花未省孫陽身沒後
幾多騏驎困鹽車

秦庭

楚國君臣草莽間
吳王戈甲未東還
包胥不動咸陽哭
爭得秦兵出武關

延平津

延平津路水溶溶
峭壁巍岑一萬重
昨夜七星潭底見
分明神劍化為龍

瑤池

阿母瑤池宴穆王
九天仙樂送瓊漿
漫矜八駿行如電
歸到人間國已亡

銅柱

一柱高標險塞垣
南蠻不敢犯中原
功臣自合分茅土
何事翻銜惹政寬

關西

楊震幽魂下北邙
關西蹤跡遂荒涼
四知美譽留人世
應與乾坤共久長

高陽池

古人未遇卽銜杯
所肯愁腸得酒開
何事山公持玉節

等聞深入醉鄉來

瀘水

五月驅兵入不毛月明瀘水瘴煙高誓將雄畧酬三顧
宣憚征蠻七縱勞

細柳營

文帝鑿輿勞北征條侯此地整嚴兵轅門不峻將軍令
今日爭知細柳營

葉縣

葉公丘墓已塵埃雲蟲崇墉亦半摧借問往年龍見日
幾多風雨送將來

杜郵

自古功成禍亦侵武安寬向杜郵深五湖煙月無窮水
何事遷延到陸沈

柯亭

一宿柯亭月滿天笛亡人沒事空傳中郎在世無甄別
爭得名垂爾許年

葛陂

長房回到葛陂中人已登真竹化龍莫道神仙難頓學
嵇生自是不遭逢

博浪沙

嬴政鯨吞六合秋削平天下虜諸侯山東不是無公子
何事張良獨報讐

隴西

乘春來到隴山西隗氏城荒碧草齊好笑王元不量力

函關那受一九泥

白帝城

蜀江一帶向東傾江上巍峩白帝城自古山河歸聖主
子陽虛共漢家爭

牛渚

溫嶠南歸輟棹晨燃犀牛渚照通津誰知萬丈洪流下
更有朱衣躍馬人

朝歌

長嗟墨翟少風流急管繁絃似寇讐若解聞韶知肉味
朝歌欲到肯回頭

谷口

一旦天真逐水流虎爭龍戰為諸侯子真獨有煙霞趣
谷口耕鋤到白頭

武陵溪

一溪春水徹雲根流出桃花片片新若道長生是虛語
洞中爭得有秦人

大澤

白蛇初斷路人通漢祖龍泉血刃紅不是咸陽將瓦解
素靈那哭月明中

澗池

日照荒城芳草新相如曾此挫強秦能令百二山河主
便作樽前擊缶人

峴山

曉日登臨感晉臣古碑零落峴山春松間殘露頻頻滴

酷似當時墮淚人

滎陽

漢祖東征屈未伸
滎陽失律紀生焚
當時天下方龍戰
誰為將軍作誅文

長城

祖舜宗堯自太平
秦皇何事苦蒼生
不知禍起蕭牆內
虛築防邊萬里城

赤壁

烈火西焚魏帝旗周郎開國虎爭時
交兵不假揮長劍已挫英雄百萬師

田橫墓

古墓崔嵬約路歧歌傳薤露到今時
也知不去朝黃屋祇為曾烹鄒食其

青門

漢皇提劍滅咸秦亡國諸侯盡是臣
唯有東陵守高節青門甘作種瓜人

姑蘇臺

吳王恃霸棄雄才，貪向姑蘇醉醅。
醅不覺錢塘江上月，一宵西送越兵來。

息城

息亡身入楚王家，回首春風一面花。
感舊不言長掩淚，祇應翻恨有容華。

上蔡

上蔡東門狡兔肥，李斯何事忘南歸。
功成不解謀生退。

直待雲陽血染衣

武昌

王濬戈鋌發上流武昌鴻業土崩秋思量鐵鎖真兒戲
誰為吳王畫此籌

鴻溝

虎倦龍疲白刃秋兩分天下指鴻溝項王不覺英雄挫
欲向彭門醉玉樓

褒城

恃寵嬌多得自由
驪山舉火戲諸侯
祇知一笑傾人國
不覺邊塵滿玉樓

金陵

侯景長驅十萬人
可憐梁武坐蒙塵
生前不得空王力
徒向金田自捨身

洛陽

石勒童年有戰機
洛陽長嘯倚門時
晉朝不是王夷甫
大智何由得預知

番禺

重岡復嶺勢崔嵬
一卒當關萬卒回
不是大夫多辨說
尉他爭肯築朝臺

汨羅

襄王不用直臣籌
放逐南來澤國秋
自向波間葬魚腹
楚人徒倚濟川舟

彭澤

英傑那堪屈下僚
便裁門柳事蕭條
鳳凰不共雞爭食

莫怪先生懶折腰

欽定四庫全書

萬首唐人絕句

三

萬首唐人絕句卷五十三

欽定四庫全書

萬首唐人絕句卷五十四

宋 洪邁 編

七言

曲江春草

鄭 谷

花落江隄簇暖煙
雨餘江色遠相連
香輪莫輟青青破
留與愁人一醉眠

雪中偶題

欽定四庫全書

萬首唐人絕句
卷五十四

亂飄僧舍茶煙濕密灑歌樓酒力微江上晚來堪畫處
漁人披得一蓑歸

題慈恩寺默公院

雖近曲江居古寺舊山終憶九華峯春來老病厭迎送
翦却牡丹栽野松

卷末偶題三首

一卷疎蕪一百篇名成未敢暫忘筌何如海月生殘夜
一句能令萬古傳

七歲侍行湖外去岳陽樓上敢題詩如今衰晚無功業
何以勝任國士知

一第由來是出身垂名須為國風陳此生若不知騷雅
孤宦如何作近臣

江上阻風

水天春暗暮寒濃船閉蓬窻細雨中聞道漁家酒初熟
夜來翻喜打頭風

十月菊

節去蜂愁蝶不知曉庭還繞折殘枝自緣今日人心別
未必秋香一夜衰

鷺鷥

閒立春塘煙澹澹靜眠寒葦雨颼颼漁翁歸後沙汀晚
飛上灘頭更自由

柳

半煙半雨江橋畔映杏映桃山路中會得離人無限意
千絲萬絮惹春風

越鳥

背霜南鴈不到處倚棹北人初聽時
梅雨滿江春草歇
一聲聲在荔枝枝

忍公小軒二首

松溪水色綠於松每到松溪到暮鐘
閒得心源祇如此
問禪何必向雙峰

舊遊前事半埃塵多向中林結淨因
一念一爐香火裏
後身唯願似師身

淮上漁者

白頭波上白頭翁家逐船移浦浦風一尺鱸魚新釣得
兒孫吹火荻花中

興州江館

向蜀還秦計未成寒蛩一夜遶牀鳴愁眠不穩孤燈盡
坐聽嘉陵江水聲

投所知

砌下芝蘭新滿徑門前桃李舊垂陰却應回念江邊草

放出春煙一寸心

淮上與友人別

揚子江頭楊柳春
揚花愁殺渡江人
數聲風笛離亭晚
君向瀟湘我向秦

七祖院小山

小巧功成雨蘚斑
軒車日日扣松關
我眉咫尺無人去
却向僧窻看假山

傳經院壁畫松

危根瘦蓋聳孤峰珍重江僧好筆蹤得向游人多處畫
却勝澗底作真松

貧女吟

塵壓鴛鴦廢錦機滿頭空插麗春枝東鄰舞妓多金翠
笑剪燈花學畫眉

送張逸人

人間疎散更無人浪兀孤舟酒兀身蘆筍鱸魚拋不得
五陵珍重五湖春

為人題

淚濕孤鸞曉鏡昏
近來方解惜青春
杏花楊柳年年好
不忍回看舊寫真

無本上人小齋二首

寒寺唯應我訪師
人稀境靜雪消遲
竹西落照侵窻好
堪惜歸時落照時

松上江雲石上苔
自嫌歸去夕陽催
山門握手無他語
只約今冬看雪來

贈日東鑒禪師

故國無心渡海潮
老禪方丈倚中條
夜深雨絕松堂靜
一點山螢照寂寥

蜀中賞海棠

濃淡芳春滿蜀鄉
半隨風雨斷鶯腸
浣花溪上堪惆悵
子美無情為發揚

再經南陽

平蕪漠漠失樓臺
昔日游人亂後來
寥落墻垣春欲暮

燒殘宮樹有花開

讀李白集

何事文星與酒星一時分
付李先生高吟大醉三千首
留着人間伴月明

席上貽歌者

花月樓臺近九衢
清歌一曲倒金壺
坐中亦有江南客
莫向春風唱鷓鴣

酬高蟾先輩

張生故國三千里知者唯應杜紫微君有君恩秋後葉
可能更羨謝玄暉

蓮葉

移舟水濺差差綠倚檻風搖柄柄香多謝浣溪人未折
雨中留得蓋鴛鴦

早入諫院二首

玉階春冷未催班暫拂塵衣枕笏眠孤立小心還自笑
夢覓潛繞御壚煙

紫雲重疊抱春城
廊下人稀唱漏聲
偷得微吟斜倚柱
滿衣花露聽宮鶯

東蜀春晚

如此浮生更別離
可堪長慟送春歸
潼江水上楊花雪
剛逐孤舟繚繞飛

野步

翠嵐迎步興何長
笑領漁翁入醉鄉
日暮渚田微雨後
鷺鷥閒暇稻花涼

下第退居二首

年來還未上丹梯正着漁簑謝故溪
落盡梨花春又了
破籬殘雨晚鶯啼

未嘗青杏出長安
豪士應疑怕牡丹
只有退畊畊不得
默然春落水吹殘

歌枕

歌枕高歌日午春
酒酣睡足最關身
明明會得窮通理
未必輸他馬上人

經賈島墓

水遶荒墳縣路斜
耕人訝我久咨嗟
重來兼恐無尋處
日落風吹鼓子花

贈下第舉公

見君失意我惆悵
記得當年落第情
出去無慘歸又悶
花南漫打講鐘聲

悶題

莫厭九衢塵土間
秋晴滿眼是南山
僧家未必全無事

道着訪僧心且閒

初還京師

秋光不見舊池臺
四顧荒涼瓦礫堆
火力不能燒地力
亂前黃菊眼前開

春陰

携琴當酒度春陰
不解謀生只解吟
舞蝶歌鶯莫相說
老郎心是老僧心

浯溪

湛湛清江疊疊山白雲白鳥在其間漁翁醉睡又醒睡
誰道皇天最惜閒

失鷺鷥

野格由來倦小池鷺飛却下碧江涯月昏風急宿何處
秋岸蕭蕭黃葦枝

文昌寓直

何遜空階夜雨平朝來交直雨新晴落花亂下花塼上
不忍和苔踏紫英

街西晚歸

御溝春水繞閒坊
信馬歸來傍短牆
幽榭名園臨紫陌
晚風時帶牡丹香

偶書

承時偷喜負明神
務實那能得庇身
不會蒼蒼主何事
忍饑多是力耕人

閒題

舉世何人肯自知
須逢精鑑定妍蚩
若教嫗母臨明鏡

也道不勞紅粉施

下峽

憶子啼猿繞樹哀
雨隨孤棹過陽臺
波頭未白人頭白
瞥見春風灑瀕堆

江宿聞蘆管

寒曲淒涼楚水濱
聲聲吹出落梅春
須知風月千墻下
亦有胡蘆河畔人

和知己秋日傷懷

流水歌聲共不回
去年天氣舊亭臺
梁塵寂寞燕歸去
黃蜀葵花一朵開

重訪黃神谷策禪者

初塵芸閣來禪閣
却訪支郎是老郎
我趣轉卑師趣靜
數峯秋雪一爐香

定水寺行香

聽松看畫繞虛廊
風拂金鑪待賜香
丞相未來春雪密
暫偷閒卧老僧牀

黃鶯

春雲薄薄日輝輝
宮樹煙深隔水飛
應為能歌繫仙籍
麻姑乞與女真衣

槐花

璿璣金蕊撲晴空
舉子覓驚落照中
今日老郎猶有恨
昔年相戲十秋風

永日有寄

能消永日是樗蒲
坑塹由來似宦途
兩擲未離捷掇內

坐中可惜為呼盧

小桃

和烟和雨遮敷水映竹映村連
霸陵撩弄春風耐寒冷
到頭贏得杏花憎

苔錢

春紅秋紫繞池臺
箇箇圓如濟世財
雨後無端滿窮巷
買花不得買愁來

靜吟

騷雅荒涼我自安
月扣餘雪夜吟寒
相門相客應相笑
得句勝於得好官

菊

王孫莫把比荆蒿
九日枝枝近鬢毛
露濕秋香滿池岸
由來不羨五松高

壬戌西幸後

武德門前顙氣新
雪融鴛瓦土膏春
夜來夢到宣麻處
草沒龍墀不見人

多虞

多虞難住人稀處
近耗渾無戰罷碁
向闕歸山俱未得
且沽春酒且吟詩

短褐

閒披短褐杖山藤
頭不是僧心是僧
坐睡覺來清夜半
芭蕉影動道場燈

曲江紅杏

遮莫江頭柳色遮
日濃鶯睡一枝斜
女郎折得殷勤看

道是春風及第花

折得梅

寒步江村折得梅孤香不肯待春催
滿枝盡是愁人淚
莫殢朝來露濕來

牡丹

畫堂簾卷張清宴含香帶霧情無限
春風愛惜未放開
柘枝鼓振紅英綻

寂寞

江郡人稀便是村
踏青天氣欲黃昏
春愁不破還成醉
衣上淚痕和酒痕

亂後灞上

柳絲牽水杏房紅
煙岸人稀草色中
日暮一行高鳥處
依稀合是望春宮

長門怨二首

閒把羅衣泣鳳凰
先朝曾教舞霓裳
春來却羨桃花落
得逐晴風出禁墻

流水君恩共不回
杏花爭忍掃成堆
殘春未必多煙雨
淚滴閒堦長綠苔

三月三日舟中奉和

張說

暮春三月日重三
春水桃花滿禊潭
廣樂逶迤天上下
仙舟搖衍鏡中酣

上巳日貢院贈內

權德輿

三日韶光處處新
九華仙洞七香輪
老夫留滯何由去
珉玉相和正繞身

襖飲尋春興有餘
深情婉婉見雙魚
同心齊體如身到
臨水煩君便袞除

曲江上巳

趙璜

長堤十里轉香車
兩岸煙花錦不如
欲問神仙在何處
紫雲樓閣向空虛

題七夕圖

帝子吹簫上翠微
秋風一曲鳳凰歸
明年七月重相見
依舊高懸織女機

三月晦日會李員外

令狐楚

三月唯殘一日春
玉山傾倒白鷗馴
不辭便學山人醉
交下無人作主人

中元日贈張尊師

偶來人世值中元
不獻玄都永日閒
寂寂焚香在仙觀
知師遙禮玉京山

和張燕公汎洞庭

尹恁

風光浙滌草中飄
日采熒熒水上搖
幸奉瀟湘雲壑意

山傍容與動仙橈

蜀中九日

王勃

九月九日望鄉臺他席他鄉送客杯人今已厭南中苦
鴻鴈那從北地來

賀子及第贈營妓紅綾

楊汝士

郎君得意及青春蜀國將軍又不貧一曲高歌紅一匹
兩頭娘子謝夫人

及第後宿平康里

裴思謙

銀缸斜背解明璫
小語低聲賀玉郎
從此不知蘭麝貴
夜來新惹桂枝香

送司馬道士遊天台

宋之問

羽客笙歌此地違
離筵數處白雲飛
蓬萊闕下長相憶
桐栢山頭去不歸

登逍遙樓

逍遙樓上望鄉關
綠水泓澄雲霧間
北去衡陽二千里
無因鴈足繫書還

荅泉州使君重陽贈酒

李嘉祐

欲強登高無力去，籬邊黃菊為誰開。
共知不是潯陽郡，那得王宏送酒來。

仲月賞花

韋同則

梅花似雪柳含烟，南地風光臘月前。
把酒且須判却醉，風流何必待歌筵。

九月十日即事

陳羽

漢江天外東流去，巴塞連山萬里秋。
節過重陽人病起，

一枝殘菊不勝愁

題雲夢亭

崔櫓

薄煙如夢雨如塵
霜景晴來却勝春
好住池西紅葉樹
明年今日伴何人

九日登高懷友

鄭綯

簪茱泛菊俯平阡
飲過三杯却惘然
十歲此辰同醉友
登高各處已三年

樊川寒食二首

盧延讓

寒食權豪盡出行一川如畫雨初晴誰家金絡遊春盛
擔入花間軋軋聲

鞍馬和花總是塵歌聲處處有佳人五陵年少麤於事
栲栳量金買斷春

楊枝枝詞

滕邁

三條陌上拂金羈萬里橋邊映酒旗此日令人腸欲斷
不堪將入笛中吹

代妻荅

幽州士子

蓬鬢荆釵世所稀
布裙猶是嫁時衣
胡麻好種無人種
合是歸時底不歸

不第失意賦

盧汪

惆悵興亡繫綺羅
世人猶自選青娥
越王解破夫差國
一箇西施已太多

徐州使院作

王智興

平生弓劍自相隨
剛被郎官遣作詩
江南花柳從君詠
塞北煙塵我自知

折楊柳

喬知之

可憐濯濯春楊柳
攀折將來就織手
妾容同此共盛衰
何必君恩獨能久

九月九日旅望

邵大震

九月九日望遙空
秋水秋天生夕風
寒鴈一向南飛遠
游人幾度菊花叢

獻主文

劉虛白

三十年前此夜中
一般燈火一般風
不知歲月能多少

猶著麻衣待至公

槐花

翁承贊

雨中裝點望中黃
勾引蟬聲送夕陽
憶昔當年隨計吏
馬蹄終日為君忙

上巳寄益中丞

鮑防

世間禊事風流處
鏡裏雲山若畫屏
今日會稽王內史
好將賓客醉蘭亭

萬首唐人絕句卷五十四